

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Uzvišeni Allah, dž.š., u suri El-Isra se kaže: **„Gospodar tvoj zapovijeda da se samo Njemu klanjate i da roditeljima dobročinstvo činite. Kad jedno od njih dvoje, ili oboje, kod tebe starost dožive, ne reci im ni: „Uh!“ - i ne podvikni na njih, i obraćaj im se riječima poštovanja punim. Budi prema njima pažljiv i ponizan i reci: „Gospodaru moj, smiluj im se, oni su mene, kad sam bio dijete, njegovali!“** (23-24)

Dobročinstvo prema roditeljima predstavlja jedno od najdražih djela Allahu dž.š.. a neposlušnost prema njima, prema hadisu, definiše se kao najveći grijeh, odmah nakon širka (pripisivanja druga Allahu dž.š.) i kufra (nevjerovanja u Allaha dž.š.).

Roditelji utroše veliki dio svog života na djecu. Odgajaju ih, hrane, školuju, brinu o njima kada su i zdravi, a posebno nad njima bdiju kada se razbole i tako dok ih ne izvedu na selamet (stasaju i osamostale se).

Naravno, riječ je o najvećem broju roditelja koji su odgovorni prema svojoj djeci. Oni zaslužuju da im se posveti dužna pažnja kada se zbog djece potroše i kada dožive starost.

Osnovne dužnosti djece prema roditeljima su: da ih vole, poštuju i pomažu, da prema njima budu blagi i milostivi, da ih izdržavaju ako su tome potrebni, da ih obilaze ako ne žive zajedno, da ih posjećuju ako su bolesni i da im donose poklone, da održavaju lijepe odnose sa njihovim prijateljima i da im klanjaju dženazu kada presele na Ahiret.

Ibni Madže u svojoj zbirci prenosi da je netko upitao Poslanika, s.a.v.s., o dužnostima djece prema roditeljima, a on je odgovorio: **„Oni su ti Džennet ili Džehennem.“**

Nažalost, neka djeca ovo zaboravljaju! Zaboravljaju da je najlakši način da zaradimo Džennet slušati, poštovati i činiti dobro roditeljima!

Jedne prilike Muhammed, s.a.v.s., je tri puta glasno ponovio: **„Neka ga je sram! Pa su ashabi upitali - Koga o Allahov Poslaniče? - Onoga kod koga roditelji dožive starost, a on (kod njih) ne zaradi Džennet.“** (Muslim)

Nažalost, djeca više nisu pomoć i garant mirne starosti. Vrijeme, odnosno, ljudi su se promijenili. Gorku istinu kazuje turska poslovice: **„Otac (od**

**hrani devet sinova, devet sinova ne mogu da dohrane jednog oca!“**

Allah, dž.š., nam poručuje u Kur'anu: **„Mi smo naredili čovjeku da bude poslušan svojim roditeljima. Majka ga nosi a njeno zdravlje trpi i odbija ga u toku od dvije godine. Budi zahvalan Meni i roditeljima svojim. Meni ćete se svi vratiti.“** (Lukman,14)

Djeci je gotovo nemoguće odužiti se roditeljima za sve ono što su učinili za njih. U brojnim hadisima se navodi da su ashabi pitali Allahovog Poslanika, s.a.v.s., da li su se nekim svojim postupcima odužili svojim roditeljima, pa je on odgovarao da se time nije odužilo ni za jedan njihov uzdah.

U predaji koju je zabilježio Imam Buharija stoji da je jedanput Abdullah ibn Omer, r.a.. dok je bio kod Kabe primijetio čovjeka koji tavafi noseći na leđima svoju majku. Prolazeći pored Abdullaha ibn Omera upita ga: „Što misliš jesam li se ja odužio svojoj majci čineći ovo?“ Ovaj velikan islama mu reče: „Nisi moj prijatelju ni za jedan njezin porođajni bol!“

Dobročinstvo prema roditeljima je ono što produžava život čovjeku. Sehl ibn Mu'az prenosi od svog oca da je Poslanik, s.a.v.s., rekao: **„Blago onome tko bude dobročinstvo činio svojim**

**roditeljima. Uzvišeni Allah će mu produžiti životni vijek!“**

Treba naći načina da se roditelji zadovolje i usreće. Nekada je za to potrebno veoma malo truda, napora i materijalnih sredstava. Opasno je da roditelji proliju suze zbog nas i našeg ponašanja. Na sve načine to moramo izbjegavati, jer Abdullah b. Omer, r.a, ashab koji je najstriktnije primjenjivao Sunnet Allahovog Poslanika, s.a.v.s., upozorava: „**Suze roditelja ubrajaju se u neposlušnost i velike grijeh!**“

Draga braćo i sestre, radimo za majčinu dovu, a ne kletvu, jer se i jedno i drugo primaju kod Allaha dž.š.!

Prenosi se da je Musa, a.s., pitao svog Gospodara: „Gospodaru, pokaži mi tko će biti moj drug u Džennetu?“ Pa mu Uzvišeni Allah objavi: „O Musa, onaj čovjek koji prvi prođe ovim putem pored tebe on će biti tvoj drug u Džennetu.“ I prođe pored njega jedan čovjek, a Musa, a.s., krenu za njim želeći da dozna šta ovaj čovjek čini da bi dostigao tu deredžu (stepen), da bude u društvu poslanika u Džennetu? Upitao ga je može li mu praviti društvo i ovaj pristade. Čovjek stiže do jedne kuće, uđe u nju i sjede ispred jedne starice, pa uze meso koje je donio sa sobom, ispeče ga i zalogaj po zalogaj nahrani onu staricu,

a zatim je napoji i izade iz kuće. Musa, a.s., ga upita: „Tako ti Allaha, tko je ona?“ A čovjek, ne znajući tko ga pita, reče: „Ona je moja majka.“ Musa, a.s., mu reče: „A zar ona ne moli Allaha za tebe?“ Odgovori mu ovaj čovjek: „Ona moli Allaha za mene samo jednom dovom i nikad je ne mijenja.“ Reče mu Musa, a.s.: „Što kaže ona u toj dovi?“ Odgovori mu: „Ona stalno moli u toj dovi za mene riječima: - Allahu moj, učini mog sina drugom Musa'a ibn Imrana u Džennetu.“ Pa mu reče Musa, a.s.: „Raduj se! Allah je primio njenu dovu, ja sam Musa ibn Imran!“

Zato, braćo i sestre, nemojmo zaboraviti naše roditelje! Nemojmo zaboraviti ono što su oni uradili za nas! I nemojmo zaboraviti da nam poslušnost prema roditeljima otvara vrata Dženneta i da je Džennet pod majčinim nogama! Na kraju, uputimo dovu Uzvišenom Allahu da našim roditeljima podari najveće stepene u Džennetu.

Amin!

Prethodne hutbe potražite na našoj stranici: [www.medzlis-split.org](http://www.medzlis-split.org)  
Pripremio: Vahid ef. Hadžić Split, 23.3.2018.

# MAJČINA DOVA

515